



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu : Novembru 2011
Edisaun : 30 Novembru 2011

Tribunál Rekursu hala'ó audiénsia renovasaun de prova ba kazu violasaun seksuál

Iha loron 24 Novembru 2011 Tribunál Rekursu hala'ó audiénsia julgamentu ba kazu violasaun seksuál ho númeru prosesu 83/C.O/2011/TR. Audiénsia julgamentu ne'e hala'ó ho agenda renovasaun de prova ba kazu ne'ebé rekerente (arguidu) ho inisiál HS hamutuk ho nia defeza rekere ba Tribunál Rekursu hafoin rekerente la satisfas ho desizaun Tribunál Distritál Dili nian ne'eb'é hamonu pena tinan 15 prizaun ba krime violasaun seksuál ne'ebé rekerente komete hasoru lezada GG(15) iha tinan 2010 iha Distritu Aileu.

Juízes Tribunál Rekursu ne'ebé preside ba julgamentu ida ne'e, kompostu husi Dr. Cláudio Ximenes (Prezidente Juízes Koletivu), Dra. Maria Natércia no Dr. Jose Luis da Goia. Ministériu Públiku representa husi Dr. Jose Luis Landim no Dr. Cançio Xavier (Defensór Públiku) nu'udar representante legál ba rekerente HS.

Diretór interinu, Casimiro dos Santos hateten katak renovasaun de provas husi tribunál Rekursu ba kazu violasaun seksuál refere importante no tuir lei haruka tanbá, bainhira ema ida tantu arguidu ou lezada/u la simu desizaun husi tribunál primeíra instânsia nian bele rekere ba tribunál ne'ebé ás liu.

Tuir observasaun JSMP nian katak rekerente liu husi nia defeza rekere ba Tribunál Rekursu hodi hala'ó audiénsia renovasaun ba provas ne'e, hodi haree fila fali desizaun tribunál Dili nian tanbá parte rekerente la simu akordaun tribunál primeíra instânsia tanbá tuir rekerente, akordaun ne'e todan liu ba nia.

JSMP observa katak faktus sira ne'ebé consegue produs iha julgamentu mak arguidu konsideira no konfesa katak nia halo duni relasaun seksuál ho lezada ne'ebé nu'udár ninia namorada tanbá

hakarak ho hakarak. Arguidu mós deklara sira halo relasaun seksuál dala barak no iha ikus mak antes lezada ba eskola iha Sub Distritu Ossu Viqueque.

Iha parte seluk, lezada deklara ba tribunál katak iha momentu ne'ebá depois hetan telefone husi arguidu, lezada ba iha arguidu nia uma. To'ó iha arguidu nia uma sira nain rua túr iha sala vizita maibé la kleur arguidu ho forsa dada lezada nia liman hodi tama ba kuartu laran.

To'ó tiha kuartu laran arguidu ho obrigatoriu dudu lezada ba iha kama, kolu lezada nia roupa, no halo violasaun seksuál hasoru nia. Lezada mós deklara katak depois akontesimentu nia nunka fo hatene ba ninia inan aman ka família ruma ho razaun lezada tauk.

Lezada haktuir liu tan katak problema ne'e foin mak nia hato'ó ba nia família hafoin relatoriu médiku husi Klinika Lanud-Bairopite hatudu nia pozitivu isin rua fulan haat.

Relasiona ho akontesimentu violasaun seksuál refere, juíz husu ba lezada tanbá sa mak iha momentu ne'ebá nia la hakilar ka halo rezisténsia seluk ruma hodi hasoru arguidu ninia maneiras, maibé lezada nonook no la esplika buat ruma konabá ida ne'e.

Iha alegasaun ba julgamentu renovasaun prova ne'e, Ministériu Públiku husu ba meritísimu Juízes Tribunál Rekursu, atu tau konsiderasaun ba aktus krimes ne'ebé arguidu halo hasoru lezada ho idade minoridade. Tanbá tuir Ministériu Públiku katak hahalok arguidu ne'e fó impaktu ba lezada lakon ninia futuru no hetan presaun psikológicamente iha ninia sosiedade no hahalok arguidu nian kontra normas kulturál Timór Lésté ninia nune'é, merese kondena atu fo edukasaun ba públiku sosiedade Timór Lésté nia direitu futuru.

Liu tan, Ministériu Públiku husu ba Tribunál rekursu atu konsidera artigu 172, 173 Kódigu Penál ne'ebé mak kondena ba arguidu no husu atu konsidera mós desizaun husi tribunál primeira instânsia.

Hatan ba alegasaun Ministériu Públiku ne'e, parte defeza haktuir katak, la iha dúvidas no konsidera arguidu ninia deklarasoins iha autus laran konabá akontesimentu relasaun seksuál entre arguidu no lezada no laiha dúvidas katak, arguidu no lezada iha relasaun nu'udar namorado-namorada. Mesmu nune'é, tuir defeza katak nia hetan meus violénsia ne'ebé mak arguidu uza hasoru lezada bainhira sira nain rua halo relasaun seksuál, tanbá iha deklarasaun lezada nian la indika iha esforsu rezisténsia ruma hasoru arguidu iha tempu akontesimentu. Nune'é defeza husu ba tribunál rekursu atu altera artigu 172, 173 Kódigu Penál ne'ebé mak akuza ba arguidu hodi konsideira artigu 178 Kódigu Penál.

Iha fim audiénsia, Juíz Presidente Tribunál Koletivu, Dr. Cláudio Ximenes anuncia ba parte rua atu direktamente kontaktu liu husi sira nia representante legál (Ministériu Públiku no defeza) konabá desizaun husi Tribunál Rekursu.

JSMP haksolok no orgullu tebes ho audiénsia renovasaun ba provas husi Tribunál Rekursu ne'ebé loke ba públiku, tanbá meus ida ne'e hanesan pasu pozitivu ba sistema justisa atu nune'é ema barak bele hatene lala'ók prosesuál iha Tribunál Rekursu.

JSMP mós hein katak audiénsia julgamentu rekursu sira seluk iha Tribunál Rekursu bele kontinua loke ba públiku atu fó fatin ba públiku hodi avalia dezempeñu servisu Tribunál Rekursu nian kuandu la iha impedimentu ruma fo fatin atu taka ba públiku.

Atu hetan informasaun kle'an, favor kontaktu;

Casimiro dos Santos

Diretór Interinu JSMP

E-mail: casimiro@jsmp.minihub.org

Landline: 3323883/7257466